

fulltrúum, sem hafa löglegt umboð til þess að mæta á héraðsfundi, auðan kjörseðil, tvö umslög og eyðublað fyrir yfirlýsingu um að viðkomandi hafi kosið.

Hver leikmaður (safnaðarfulltrúi) ritar á kjörseðil eitt nafn aðalmanns og eitt nafn varamanns (í Reykjavíkurprófastsdæmi þó tvö nöfn aðalmanna og varamanna). Eigi skal hann undirrita kjörseðilinn eða auðkenna hann með öðrum hætti. Setur hann seðilinn síðan í óáritaða umslagið, lokar því, undirritar yfirlýsingu um að hann hafi kosið, leggur gögnin í umslag er hann áritar og sendir viðkomandi prófasti í ábyrgðarpósti.

Prófastar skulu í samráði við dóms- og kirkjumálaráðuneytið annast framkvæmd kosningarinnar.

Stjórn Prestafélags Íslands tilnefnir á árinu 1981 aðalmann og varamann í kjörstjórn, sbr. 8. gr. 2. málsg. laga nr. 96/1980.

Dóms- og kirkjumálaráðuneytið, 12. mars 1981.

Friðjón Þórðarson.

Þorleifur Pálsson.

REGLUGERÐ

um happdrættislán ríkissjóðs í 1. fl. 1981 vegna framkvæmda við Norðurveg og Austurveg.

1. gr.

Fjármálaráðherra f. h. ríkissjóðs gefur út til sölu innanlands happdrættisskuldabréf, samtals að fjárhæð kr. 5 000 000,00, skv. heimild í fjárlögum fyrir árið 1981, svo og lögum nr. 36 frá 23. maí 1975, sbr. lög nr. 28 frá 25. maí 1979, um breyting á þeim lögum um happdrættislán ríkissjóðs fyrir hönd Vegasjóðs vegna framkvæmda við Norðurveg og Austurveg, sbr. og lög nr. 7 frá 13. mars 1974 um skattalega meðferð verðbréfa o. fl., sem ríkissjóður selur innanlands.

2. gr.

Happdrættisskuldabréf, skv. reglugerð þessari skulu nefnd Skuldabréf 1981 — 1. fl.

Þau skulu gefin út til handhafa. Verðgildi hvers skuldabréfs er 100 krónur og eru þau í töluröð. Skuldabréfin skulu seld á nafnverði. Sala þeirra hefst í aprílmánuði 1981 og henni lýkur fyrir útdráttardag vinninga, sem er 1. júní 1981.

Happdrættisskuldabréfin falla í gjalddaga eftir 5 ár eða hinn 1. maí 1986.

Á happdrættisskuldabréfunum skal tilgreindur útdráttardagur, tala vinninga og fjárhæð þeirra hvers um sig.

3. gr.

Við innlausn happdrættisskuldabréfs greiðir ríkissjóður verðbætur á höfuðstól bréfsins í samræmi við þá hækkun, er kann að verða á lánstímanum á þeirri vísitölu lánskjara (lánskjaravísitölu), er reiknuð er og auglýst er fyrir maímánuð 1981 til og með gjalddaga hinn 1. maí 1986. Seðlabanki Íslands reiknar og auglýsir lánskjaravísitölu mánaðarlega skv. heimild í 39. gr. laga nr. 13 frá 10. apríl 1979, sbr. auglýsingu bankans í Lögbirtingablaði frá 29. maí 1979. Happdrættisskuldabréfin skulu innleyst á nafnverði, þótt lánskjaravísitala lækki á tímabilinu frá 1. maí 1981 til gjalddaga þeirra. Happdrættisskuldabréfin verða ekki innleyst að hluta.

4. gr.

Rísi ágreiningur um framkvæmd ákvæða 3. gr. um greiðslu verðbóta á höfuðstól happdrættisskuldabréfanna, skal þá vísa málinu til nefndar þeirrar, sem um er fjallað í 44. gr. laga nr. 13 frá 10. apríl 1979, en hana skipa: Hagstofustjóri og er hann formaður, maður nefndur af Hæstarétti og annar nefndur af Seðlabankanum. Sama gildir ef breyting verður á grundvelli lánskjaravísitölu, og skal þá nefndin úrskurða, hvernig umreikna skuli á milli hinna tveggja vísitölugrundvalla. Úrskurðir nefndar þessarar eru fullnaðarúrskurðir.

5. gr.

Af happdrættisskuldabréfunum eru ekki greiddir vextir en vinningum úthlutað í samræmi við útdrátt númera, sbr. 6. gr.

6. gr.

Fjárhæð vinninga í þessum flokki happdrættisláns ríkissjóðs skal nema kr. 750 000,00 — sjö hundruð og fimmtíu þúsund krónum — og skal dregið um þá einu sinni hinn 1. júní 1981.

Vinningum skal úthlutað skv. skrá þeirri, sem hér fer á eftir:

1 vinningur	á kr. 150 000 = kr. 150 000
2 aukavinningar	á kr. 20 000 = kr. 40 000
10 vinningar	á kr. 10 000 = kr. 100 000
920 vinningar	á kr. 500 = kr. 460 000
933 vinningar	kr. 750 000

Aukavinningar falla á þau tvö númer, sem næst eru því númeri sem hlýtur hæsta vinning.

Vinningaskrá skal birta í Lögbirtingablaðinu sem fyrst eftir dráttardag, auk þess sem vinningaskrár skulu liggja frammi á sölustöðum.

Um útdrátt vinninga skal fara eftir reglum nr. 27 frá 14. janúar 1977 um útdrátt vinninga í happdrættislánum ríkissjóðs, útgefnum árið 1972 og síðar vegna fjárfyllunar til vegagerðar.

7. gr.

Happdrættisskuldabréfin eru undanþegin framtalsskyldu og vinningar og verðbætur eru skattfrjálsar skv. ákvæðum laga nr. 28/1979, sbr. lög nr. 7/1974.

8. gr.

Innlausn happdrættisskuldabréfa og greiðsla vinninga fer fram í Seðlabanka Íslands, Reykjavík.

Handhafar skuldabréfa, sem hlotið hafa vinning eða við innlausn eftir 5 ár, geta snúið sér til allra banka, bankaútibúa eða sparisjóða og afhent þeim skuldabréf gegn sérstakri kvittun. Viðkomandi banki, bankaútibú eða sparisjóður sér síðan um að fá greiðslu úr hendi útgefanda með því að senda Seðlabankanum skuldabréfið til fyrirgreiðslu.

Eftir gjalddaga greiðast engar verðbætur vegna hækkunar lánskjaravísitölu.

Skuldabréf þessi fyrnast á 10 árum frá gjalddaga og verða ekki innleyst að þeim tíma liðnum.

Falli happdrættisvinningur á skuldabréf, skal hans vitjað innan fjögurra ára frá útdrætti ella verður hann eign ríkissjóðs.

Sé gölluðum eða rifnum skuldabréfum framvísað til greiðslu vinnings eða innlausnar með þeim hætti, að bæði númer sjáist og meira en helmingur bréfsins fylgi,

fer innlausn fram að fullu, en sjáist aðeins annað númerið verður innlausn eða greiðsla vinnings innt af hendi af hálfu, enda sé meira en fjórðungi bréfsins framvísað.

9. gr.

Reglur XIX. kafla laga nr. 85 frá 23. júní 1936 um mál til ógildingar skjala o. fl. gilda ekki um skuldabréf samkvæmt reglugerð þessari.

10. gr.

Fjármunum þeim, sem inn koma fyrir sölu happdrættisskuldabréfanna, skal varið til viðbótar fjárframlögum, skv. vegaáætlun til framkvæmda við Norðurveg og Austurveg skv. lögum nr. 36/1975, sbr. lög nr. 28/1979.

Kostnaður við framkvæmd þessarar fjáröflunar greiðist af söluverði skuldabréfanna.

11. gr.

Reglugerð þessi, sem sett er skv. 5. gr. laga nr. 36 frá 23. maí 1975, sbr. lög nr. 28 frá 25. maí 1979, öðlast þegar gildi.

Fjármálaráðuneytið, 26. mars 1981.

Ragnar Arnalds.

Árni Kolbeinsson.

S A M Þ Y K K T

**um forkaupsrétt Suðurfjarðahrepps, Vestur-Barðastrandarsýslu,
á fasteignum innan sveitarfélagsins.**

Samkvæmt heimild í lögum nr. 22 23. júní 1932 og 26. gr. skipulagslaga nr. 19 21. maí 1964 hefur hreppsnefnd Suðurfjarðahrepps gert eftirfarandi samþykkt:

Hreppsnefnd Suðurfjarðahrepps samþykkir samkv. heimild í lögum nr. 22/1932 og 26. gr. skipulagslaga nr. 19 frá 21. maí 1964, að áskilja Suðurfjarðahreppi forkaupsrétt að öllum lóðum, jörðum og fasteignum innan marka sveitarfélagsins vegna gerðar aðalskipulags og deiliskipulags einstakra hverfa.

Samþykkt þessi öðlast gildi þegar í stað og gildir í 5 ár frá dagsetningu hennar að telja. Birtist hún til eftirbreytni öllum þeim, sem hlut eiga að máli.

Félagsmálaráðuneytið, 3. mars 1981.

F. h. r.

Hallgrímur Dalberg.

Hólmfriður Snæbjörnsdóttir.